

Tanten cu e caso ta na arbitrahe

ASTEC kier pa Huez wanta destaho publico di APA pa proyecto mudamento di waf



DIAHUEBS e caso hudicial cu ASTEC a cuminsa contra APA N.V. a tuma lugar. Abogado mr. Blauw a representa ASTEC a pidi Huez pa ordena APA pa freeze e destaho publico te ora cu arbitrahe tuma un decision den e caso profundo cu ta andando.

ASTEC ta teme cu Gobierno lo bay sera acuerdo cu un compania di Barcelona.

Según abogado mr. Blauw, e terminacion di e acuerdo ta na arbitrahe ya cu ASTEC ta haya cu APA no tin motibo imprevisto pa termina e contract.

E acuerdo entre ASTEC y APA ta termina na 2011, pero APA

kier termina e contract na 2010. Segun e abogado, na december 2008 e partidonan a sinta na mesa caminda tabatin palabracionnan unda ASTEC ta dispuesto pa inverti 40 milyon. Awor APA ta papia di terminacion di contract y kier tene destaho publico. E ta haya cu tin motibo pa freeze e destaho publico y p'e partidonan sigui negosha.

Abogado mr. Koeyers ta haya cu ASTEC ta kere cu e tin un acuerdo eterno y cu APA no por termina e contract. El a señala cu ASTEC ta busca tur forma pa stroba e destaho publico. ASTEC no kier participa den

destaho publico, pasobra e ta kere cu no por termina e contract.

Abogado mr. Koeyers a desmentí cu Gobierno lo tin palabracion cu compania di Barcelona p'e proyecto di waf. E ta haya cu si ASTEC participa den e destaho publico, e chens tey cu ASTEC lo por haya acuerdo.

El a bisa cu APA a sinta na mesa cu ASTEC pa scucha ASTEC su punto di bista y no t'asina cu tin palabracionnan haci manera ASTEC ta pretende. Mr. Koeyers a pidi pa Corte rechaza e demanda di ASTEC. Otro siman 25 di maart, Huez ta dicta sentencia.